

## Vaša pisma: Imamović i Gradska uprava Tuzla ne izvršavaju svoja obećanja!



Dobili smo pismo Udruženja kupaca SPO "15. maj", koje u cijelosti prenosimo bez ikakvih intervencija:

Dragi kupci i sugrađani,

I sami ste svjedoci da smo Vam se obratili 05.02.2019.godine i obavijestili Vas da je Gradska uprava grada Tuzla, a na naše traženje da hitno sprovede ODLUKE Gradskog vijeća, konačno nakon 10 godina „traganja za rješenjem“, pronašla zakonsko rješenje kao i finansijska sredstva za priključenje objekta SPO 15.maj na elektroenergetsku mrežu kao što je bilo definisano u ODLUCI koju je u novembru 2017.god. donijelo GV.



Odluku je trebalo što hitnije realizirati – u najkraćem mogućem vremenu. Ali kao što vidite ODLUKA GV se u Gradskoj upravi ne poštuje i nije se još sproveda niti nakon 16 mjeseci od njenog donošenja. Tada smo, također, obaviješteni da su obezbijeđena sredstva i za vanjsko uređenje oko objekta i asfaltiranje cijele površine koja je za to predviđena i povezivanje sa saobraćajnicama na ulaznoj i izlaznoj rampi.

Održan je potom i sastanak predstavnika UK SPO 15.maj u Gradskoj upravi sa Gradonačelnikom Jasminom Imamovićem i njegovim saradnicima a u prisustvu i gosp. Alić Mensura, gdje smo insistirali na ispunjenju svih preostalih zahtjeva ka definitivnom rješenju za useljenje kupaca u stanove i etažiranju istih.

Zbog gore navedenog na traženje Gradske uprave, predstavnici UK SPO 15.maj su odlučili tada zaustaviti već najavljene proteste 07.02.2019.god. nadajući se ponovno u ispunjenje datih obećanja koja smo dobili i za koja smo vjerovali da će konačno biti ispunjena te da ćemo svakako budno pratiti njihovo ispunjenje!

Međutim, od prethodnog sastanka, u kabinetu Gradonačelnika Imamovića, sve ide sporo, nema pomaka i samo je u martu mjesecu ove godine izvršena uplata 50% od ukupno potrebnih sredstava Elektrodistribuciji Tuzla za priključenje objekta na elektroenergetsku mrežu.

16.04.2019.god. ponovno smo imali sastanak u Prostorijama Gradske uprave i ponovno razočarenje po ko zna koji puta...Načelnik Imamović nije bio niti prisutan, problem se ponovno relativizuje, gubi se vrijeme, nema nikakvih rokova, razvlači se pamet kupcima...

Na sastanku smo obaviješteni, da iako je nekako uplaćena prva rata za priključak struje, da Elektrodistribucija Tuzla neće početi sa radovima dok se ne uplati i preostalih 50%. Dok se ne uradi priključak struje, jer ima kopanja radi polaganja kablova kod prilaza zgradi, nema daljih radova na vanjskom uređenju oko objekta i asfaltiranja cijele površine platoa oko zgrade.

Mi smo čak, da bi krenuli u postupak legalizacije zgrade i tehničkog prijema, sami finansirali i konačno predali i Projekat izvedenog stanja objekta, a koji investitori nisu također uradili a platili smo im –mi plaćamo ceh za njihov kriminal!

U okolne zgrade kupci, koji su na isti način kupovali stanove, bez problema useljavaju i knjiže svoje stanove- zašto ? jer se pošteno radi i ispunjavaju se ugovori... Ali kupci stanova, poslovnih prostora i garaža u SPO 15.maj, zbog kriminala za koji svi znate, nisu niti do sada u mogućnosti useliti u stanove.

Svi to znaju ...čak i Tužilaštvo, ali nema odgovora od Kantonalnog tužilaštva po krivičnim prijavama od prije 3 godine, koje niti hoće niti smije, proglasiti krvima odgovorne za kriminal i korupciju decenije u Tuzli.. Obračali smo se i VSTV-u ali ništa sve isto...akteri su izvan zakona na visokim položajima, nedodirljivi ruci pravde.

Proše godine smo na protestima tražili useljenje u stanove za 15.maj, ali uskoro će 15. maj i ove godine. Sada ponovo tražimo od Gradske uprave da hitno načini drugu uplatu za priključak struje da možemo upaliti sijalice u stanovima bar 15.maja ove godine.

Drugi problem, kako ga zovu "Kaiš", je dio zemljišta koji pripada Gradu a u koji su tokom gradnje „ušli“ investitori Direkcija i Mirsad Simićić, a što nama sada predstavlja također veliki problem jer je uslov za tehnički prijem objekta potpuno razrješenje imovinskih odnosa pa i tog dijela zemljišta. Vrijednost kajiša iznosi 72.600KM. Tražimo da nam Gradska uprava razriješi i taj problem jer mi ne želimo ispaštati zbog svih tuđih grešaka i propusta.

Napominjemo da su kupci iako su u cjelosti isplatili stanove, spremni snositi i rentu na dograđene spratove u iznosu 195.000 kako bi se uz rješavanje gore navedenog kajiša riješili pravno –imovinski odnosi i stekli uslovi za uknjižbu stanova, poslovnih prostora i garaža. Pored toga kupci će sami završavati stanove u zatečenom stanju.

Obzirom da smo toliko puta izmanipulisani i obmanuti ne želimo više čekati na useljenje i uknjiženje svojih stanova, mi kupci više nemamo strpljenja i bojimo se velikih problema ukoliko se ne ispune ODLUKE GV vrlo brzo, prvenstveno priključak struje .

Tražimo da se do naredne sjednice GV 24.04.2019. god uplati preostalih 50% za priključak za struju te da se konačno krene sa radovima.

Tražimo da se radovi i brzo završe te da možemo upaliti svjetlo u svojim stanovima ovogodišnjeg 15.maja.

Tražimo da se hitno počne a i završi vanjsko uređenje objekta i asfaltiranje te da se kupcima obezbijedi useljenje i uknjiženje stanova .

Ukoliko se ne ispune naši zahtjevi kupci moraju ponovno na ulicu i ko zna za šta su još spremni. Strpljenju je kraj!

Pozivamo Vas da se svi organizujete i solidarišete sa nama i podržite nas jer Gradska uprava izgleda može ovo riješiti samo pod pritiskom.

Pozivamo naravno sve građane, udruženja, medije da nas prate i podrže naše aktivnosti ukoliko ne dođe do ispunjenja naših zahtjeva! (UK SPO 15.maj Tuzla, 17.04.2019.godine)

Date: 17-04-2019